

Na osnovu člana 78. Zakona o prostornom uređenju ("Službene novine Kantona Sarajevo", broj 7/05), člana 13. Zakona o principima lokalne samouprave u Federaciji BiH („Službene novine Federacije BiH“, broj 49/06) i člana 25. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 31/08 ), Općinsko vijeće Stari Grad Sarajevo, na sjednici održanoj 25. februara 2010. godine, donijelo je

## ODLUKU O SJEČI I POTKRESAVANJU STABALA

### Član 1.

Ovom Odlukom se uređuje postupak sječe i potkresavanja stabala na javnim površinama na području Općine Stari Grad Sarajevo (u daljem tekstu: Općina) i izuzetno na zemljištu u privatnom vlasništvu, ako stablo ugrožava život i zdravlje ljudi, instalacija komunalne infrastrukture te stabilnost okolnih objekata.

### Član 2.

Sječa i potkresavanje stabala vrši se na osnovu odobrenja koje donosi Općinski načelnik putem Službe za komunalne poslove i investicije Općine.

### Član 3.

(1) Općinski Načelnik rješenjem imenuje komisiju koja daje stručno mišljenje i nalaz u svakom pojedinačnom slučaju.

(2) Komisija iz stava 1. ovog člana je sastavljena od tri člana a jedan član je stručnjak iz oblasti šumarstva i predstavnik je KJKP "Park".

### Član 4.

(1) Sječa stabla odobriće se :

- ako je stablo prestalo sa vegetacijom;
- ako postoji opasnost od pada stabla;
- ako stablo ugrožava život i zdravlje ljudi, instalacija komunalne infrastrukture te stabilnost okolnih objekata;
- ako se stablo nalazi na lokaciji za koju je izdato pravosnažno odobrenje za građenje;
- ako ugrožava bezbjednost i preglednost saobraćaja.

(2) Potkresavanje stabla odobriće se :

- ako stablo svojim rastom utiče na uslove života i rada ljudi u okolnim objektima;
- ako je djelimično prestalo sa vegetacijom;
- ako oštećuje okolne objekte ili instalacije komunalne infrastrukture
- ako ugrožava bezbjednost i preglednost saobraćaja

(3) Ukoliko se radi o stablu koje zbog svog položaja ( stabla u obuhvatu zaštićenih površina), vrste stabla ili iz drugih razloga predstavlja hortikulturnu i biološku vrijednost, odobrenje za sječu ili potkresavanje donosi se po prethodno pribavljenom mišljenju Kantonalnog zavoda za zaštitu kulturno historijskog i prirodnog naslijeđa.

#### **Član 5.**

Održavanje stabala u obavezi je :

- vlasnika ili korisnika zemljišta na kojem se stablo nalazi;
- upravitelja zgrade ukoliko se radi o stablu koje se nalazi u okućnici objekta kolektivnog stanovanja;
- komunalnog preduzeća na površinama utvrđenim Odlukom o održavanju zelenih i rekreacionih površina ( "Službene novine Grada Sarajeva"), broj 6/87 i Zakona o komunalnim djelatnostima («Službene novine Kantona Sarajevo» broj 31/04 ).

#### **Član 6.**

(1) Zahtjev za sječu ili potkresavanje stabla može podnijeti vlasnik ili korisnik zemljišta na kojem se stablo nalazi, investitor novog objekta, upravitelj zgrade i zainteresovano lice.

(2) Postupak za sječu ili potkresavanje stabla može pokrenuti i općinski organ uprave nadležan za komunalne poslove po službenoj dužnosti.

#### **Član 7.**

Uz zahtjev za izdavanje odobrenja za sječu ili potkresavanje stabla dostavlja se kopija katastarskog plana sa ucrtanom lokacijom gdje se stablo nalazi a ukoliko se radi o sječi ili potkresavanju stabla radi izgradnje novog objekta onda i pravosnažno odobrenje za građenje.

#### **Član 8.**

Troškove sječe ili potkresavanja stabla snosi vlasnik ili korisnik zemljišta na kojem se stablo nalazi, investitor novog objekta, upravitelj zgrade, odnosno komunalno preduzeće u čijoj je nadležnosti održavanje zelenih površina.

#### **Član 9.**

(1) Općinski organ uprave nadležan za komunalne poslove može po službenoj dužnosti rješenjem naložiti vlasniku ili korisniku zemljišta na kojem se stablo nalazi da o vlastitom trošku izvrši sječu ili potkresavanje stabla ukoliko su ispunjeni uslovi iz člana 4. ove Odluke.

(2) Ukoliko vlasnik ili korisnik zemljišta ne postupi po rješenju iz stava 1. ovog člana, sječu ili potkresavanje stabla izvršiće o trošku izvršenika Općinski organ uprave nadležan za komunalne poslove putem nadležnog komunalnog preduzeća.

### **Član 10.**

(1) Sječa ili potkresavanje stabala vrši se putem fizičkih ili pravnih lica specijalizovanih i osposobljenih za tu vrstu posla.

(2) Sve štete nastale pri sječi ili potkresavanju stabla usljed nepažnje ili nepoduzimanja neophodnih mjera sigurnosti snosi lice iz stava 1. ovog člana.

### **Član 11.**

Ukoliko je zbog izgradnje novog objekta ili postavljanja instalacija neophodno uklanjanje stabla, investitor navedenih radova je dužan o svom trošku izvršiti premještanje ili sadnju novog stabla uz saglasnost nadležne Službe za komunalne poslove, na mjestu koje odredi nadležno komunalno preduzeće.

### **Član 12.**

Inspekcijski nadzor nad sprovođenjem odredaba ove odluke vrše nadležne komunalne inspekcije Općine i Kantona Sarajevo, svaka iz svoje nadležnosti.

### **Član 13.**

Ako je do dana stupanja na snagu ove Odluke upravni postupak pokrenut kod nadležnog organa a nije doneseno prvostepeno rješenje ili je rješenje poništeno i vraćeno prvostepenom organu na ponovni postupak, postupak će se nastaviti po odredbama ove Odluke.

### **Član 14.**

Ova Odluka stupa na snagu osmog dana od objavljivanja u "Službenim novinama Kantona Sarajevo."

Broj: 02-49-  
Februar 2010. godine  
Sarajevo

**PREDSAJEDAVAJUĆI  
OPĆINSKOG VIJEĆA STARI GRAD  
S A R A J E V O**

Prof.dr. Rizah Avdić